

四庫全書

子部

欽定四庫全書

子部

大學衍義補卷首

詳校官中書臣秦瀛

侍讀臣孫球覆勘

總校官編修臣王燕緒

校對官中書臣吳甸華

謄錄監生臣沈浩

欽定四庫全書

子部一

大學衍義補

儒家類

提要

臣等謹案大學衍義補一百六十卷明邱濬撰濬有家禮儀節著錄濬以宋真德秀大學衍義止於格致誠正修齊而闕治國平天下之事焉雖所著讀書一記採錄史事稱為此書之下編然多錄名臣事迹無與政典又草創

未完乃採經傳子史輯成是書附以已見分  
為十有二目于孝宗初奏上之有詔嘉獎命  
錄副本付書坊刊行濬又自言衍義補所載  
皆可見之行事請摘其要者下內閣議行帝  
亦報可至神宗復合梓行親為製序蓋皆甚  
重其書也然濬聞見雖富議論乃不能甚醇  
故王鏊震澤紀聞稱其學該洽尤熟于國家  
掌故議論高奇務于矯俗能以辨博濟其說

如譏范仲淹多事秦檜有再造功評鴈皆乖  
正理又力主舉行海運平時屢以為言此書  
更力申其說所列從前海運抵京之數謂省  
內河挽運之資即可抵洋面漂亡之粟似乎  
言之成理然一舟覆沒舟人不下百餘糧可  
抵以轉輸之費人命以何為抵乎其後萬恭  
著議謂為有大害而無微利至以好事斥之  
非苛論也又明之中葉正閭豎恣肆之時濬

既欲陳誨納忠則此條尤屬書中要旨乃獨  
無一語及宦寺張志淳南園漫錄詆其有所  
避而不書殆亦深窺其隱以視真氏原書殊  
未免瑕瑜互見然治平之道其理雖具於修  
齊其事則各有制置此猶土可生禾禾可生  
穀穀可為米米可為飯本屬相因然土不耕  
則禾不長禾不穫則穀不登穀不舂則米不  
成米不炊則飯不熟不能遞溯其本謂土可

為飯也真氏原本實屬闕遺濬博綜旁搜以  
補所未備兼資體用實足以羽翼而行且濬  
學本淹通又習知舊典故所條列原原本本  
貫串古今亦復具有根柢其人雖不足重其  
書要不為無用也乾隆四十六年十月恭校  
上

總纂官臣紀昀臣陸錫熊臣孫士毅

總校官臣陸費墀





大學衍義補原序

朕惟帝王之學有體有用自仲尼作大學一經曾子分  
釋其義以為十傳其綱明德新民止至善其目格致誠  
正修齊治平闡堯舜禹湯文武之正傳立萬世帝王天  
德王道之標準宋儒真德秀因為大學衍義掇取經傳  
子史之言以實之顧所行者止於格致誠正修齊而治  
平猶闕逮我孝宗敬皇帝時大學士丘濬乃繼續引伸  
廣取未備為大學衍義補揭治國平天下新民之要以

收明德之功采古今嘉言善行之遺以發經傳之指而後體用具備成真氏之完書為孔曾之羽翼有功於大學不淺是以孝廟嘉其考據精詳論述該博有補政治特命刊而播之朕踐祚以來稽古正學經史諸書博涉殆徧因念真氏衍義我聖祖大書于廡壁累朝列聖置之經筵肅宗聽講之餘賦翊學詩以紀之朕爰命儒臣日以進講更數寒暑至于終篇然欲因體究用而此書尤補衍義之闕朕將紬繹玩味見諸施行上溯祖宗聖

學之淵源且欲俾天下家喻戶曉用臻治平昭示朕明德新民圖治之意爰命重梓以廣其傳而為之叙如此云萬曆三十三年十二月二十一日御製

臣惟大學一書儒者全體大用之學也原於一人之心該夫萬事之理而關係乎億兆人民之生其本在乎身也其則在乎家也其功用極於天下之大也聖人立之以為教人君本之以為治士子業之以為學而用以輔君是蓋六經之總要萬世之大典二帝三王以來傳心

經世之遺法也孔子承帝王之傳以開百世儒教之宗其所以立教垂世之道為文二百有五言凡夫上下古今百千萬年所以為學為教為治之道皆不外乎是曾子親受其教既總述其言又分釋其義以為大學一篇漢儒襍之禮記中至宋河南程顥兄弟始表章之新安朱熹為之章句或問建安真德秀又剝取經傳子史之言以填實之各因其言以推廣其義名曰大學衍義獻之時君以端出治之本以立為治之則將以垂之後世

以為君天下者之律令格式也然其所衍者止於格物致知誠意正心脩身齊家蓋即人君所切近者而言欲其舉此而措之於國天下耳臣竊以謂儒者之學有體有用體雖本乎一理用則散於萬事要必析之極其精而不亂然後合之盡其大而無餘是以大學之教既舉其綱領之大復列其條目之詳而其條目之中又各有條理節目者焉其序不可亂其功不可闕闕其一功則少其一事欠其一節而不足以成其用之大而體之為

體亦有所不全矣然用之所以為大者非合衆小又豈能以成之哉是知大也者小之積也譬則網焉網固不止乎一目然一目或解則網有不張譬則室焉室固不止乎一椽然一椽或虧則室有不具此臣所以不揆愚陋竊倣真氏所衍之義而於齊家之下又補以治國平天下之要也其為目凡十有二曰正朝廷其目六曰正百

官

其目十有一

曰固邦本

其目十有一

曰制國用

其目十有一

曰明禮

樂

其目六

曰秩祭祀

其目七

曰崇教化

其目十有一

曰備規制

其目六

十有曰慎刑憲

其目十有四

曰嚴武備

其目十六

曰馭夷狄

其目

九曰成功化

其目一

先其本而後末繇乎內以及外而終

歸於聖神功化之極所以兼本末合內外以成夫全體大用之極功也真氏前書本之身家以達之天下臣為此編則又將以致夫治平之效以收夫格致誠正修齊之功因其所餘而推廣之補其畧以成其全故題其書曰大學衍義補云非敢並駕先賢以犯不韙之罪也臣嘗讀真氏之序有曰為人君者不可以不知大學為人

臣者不可以不知大學而繼之以為人君而不知大學  
無以盡正君之法是蓋就其本體而言爾若即其功用  
而究竟之君臣所當知者則固有在也粵自古昔聖賢  
為學之道帝王為治之序皆必先知而後行之必明  
其義行之必舉其要是以欲行其要者必先知其義苟  
不知其義之所在安能得其要而行之哉故臣之此編  
始而學之則為格物致知之方終而行之則為治國平  
天下之要宮闕高深不出殿廷而得以知夫邑里邊鄙



之情狀州澤出遐不履城閨而得以知夫朝廷官府之  
政務非獨舉其要資出治者以御世撫民之具亦所以  
明其義廣正君者以輔世澤民之術譬之鑒書其前編  
則黃帝之素問越人之難經後編則張仲景金匱之論  
孫思邈千金之方一方可以療一證隨其方以己其疾  
惟所用之何如也前書主於理而此則主乎事真氏所  
述者雖皆前言往事而實專主於啟發當代之君亦猶  
孔孟告魯衛齊梁之君而因以垂後世之訓臣之此編

較之前書文雖不類意則貫通第文兼雅俗事雜儒吏  
其意蓋主於衆人易曉而今日可行所引之事類多重  
復所修之辭不能雅馴弗暇計也臣遠方下士叨官禁  
近當先皇帝在御之日開經筵即綴班行之末親覲儒  
臣以真氏之書進講陛下毓德青宮又見宮臣之執經  
者日以是書進焉臣於是時蓋已有志於是既而出教  
大學暇日因採六經諸史百氏之闕也繕寫適完而陛  
下嗣登大寶蓋若有待言者臣學不足以適用文不足

以達意偶因所見而妄有所陳區區一得之愚固無足  
取而惓惓一念之忠儻為聖明所不棄焉未必無少補  
於初政之萬一臣濬謹序



進大學衍義補表

國子監掌監事禮部右侍郎臣丘濬誠惶誠懼稽首頓  
首上言伏以持世立教在六經而撮其要於大學明德  
新民有八目而收其功於治平舉德義而措之於事為  
酌古道而施之於今政衍先儒之餘義補聖治之極功  
惟知罄獻芹之誠罔暇顧續貂之誚原夫一經十傳乃  
聖人全體大用之書分為三綱八條實學者修己治人  
之要章句既有以大明聖蘊衍義又所以上格君心書

雖成於前朝道則行於今代惟太祖之建極嘗大書於殿壁之間暨列聖之紹基屢聽講於經筵之上既已致夫雍熙太和之治一皆本乎躬行心得之餘善推所為者固無俟乎盡言欲全其功者亦須補其闕畧竊觀衍義之四要尚遺治平之二條雖曰舉而措之為無難不若成而全之為盡善況有其體則有其用既成乎已當成乎人理固無一之可遺功豈有一之可闕善法不能以徒舉本末則貴乎兼該每當繙閱之時輒起編削之

念顧一人之見聞有限而天下之事體多端居一室而料度乎四方據己私而折衷乎衆務亦固知其不可猶強為其所難是蓋一念區區報國之忠抑亦平生孜孜為學之志是以頓忘下賤僭效前脩豈不知妄擬非倫竊亦欲薄陳所見念惟天下之大其本在於一身人心之微其用散於萬事一物有一物之用一方之宜所以化之者固本於身所以處之者各有其道事皆有理必事事皆得其宜人各有心須人人不拂所欲伊欲處之適

當其可必先講之務盡其詳攷古以證今隨時而應用  
積小以成其大補偏以足其全鉅細精粗而曲折周詳  
前後左右而均齊方正於以行治國平均天下之義用  
以收格致誠正脩齊之功舉本末而有始有終合內外  
而無餘無欠期必底於聖神功化之極庶以見夫大學  
體用之全體例悉準於前書措範用垂於後學稽聖經  
訂賢傳剴取無遺紀善行述嘉言蒐求罔棄附以管中  
之所見覲於日下之可行俯竭涓塵之微仰裨海嶽之



大茲蓋伏遇皇帝陛下睿智有臨剛明不惑學古訓而  
獲大道慎儉德以懷永圖蚤毓德於青宮服膺大訓時  
潛心於黃卷玩味聖經開導盡忠益之言體驗極擴充之  
力每躬行而實踐恒日就以月將仁孝之德孚於宮闈  
元良之聲播於函夏一旦承天而踐阼萬邦仰德以歸  
心大志夙成適符漢宣登極之歲小德求助肇周成訪  
落之心首深究於大猷亟恢弘於至治凡新政之大有  
建置皆舊學之素所講明廣克格致誠正之功用臻脩

齊治平之效太平之治端可計日而待也臣濬下愚陋質荒陬孤生生世無寸長頗留心於扶世讀書有一得輒妄意以著書固非虞卿之窮愁亦匪真氏之去位猥以官居三品慚厚祿以何裨年近七旬惜餘齡之無幾一年仕宦不出國門六轉官階皆司文墨莫試涖政臨民之技徒懷愛君憂國之心竭平生之精力始克成編恐無用之陳言終將覆瓿幸際朝廷更化中外肅清總攬權綱一新政務儻得徹九重之聽取以備乙夜之觀

采於十百之中用其二三之策未必無補於當世亦或有取於後人民物於是乎一新世道茲焉乎復古好所好惡所惡一人永子育乎兆民賢其賢親其親四海咸尊戴於萬世臣干冒天威無任激切屏營之至臣所撰到大學衍義補一百六十卷補前書一卷并目錄三卷共成四十帙謹奉表隨進以聞成化二十三年十一月十八日國子監掌監事禮部右侍郎臣丘濬謹上表



欽定四庫全書

大學衍義補卷首

明 丘濬 撰

誠意正心之要

審幾微補

臣按宋儒真德秀大學衍義於誠意正心之要立  
為二目曰崇敬畏曰戒逸欲其於誠意正心之事  
蓋云備矣然臣讀朱熹誠意章解竊有見於審幾

之一言蓋天下之理二善與惡而已矣善者天  
理之本然惡者人欲之邪穢所謂崇敬畏者存  
天理之謂也戒逸欲者遏人欲之謂也然用功  
於事為之著不若審察於幾微之初尤易為力  
馬臣不揆愚陋竊原朱氏之意補審幾微一節  
於二目之後極知僭踰無所逃罪然一得之愚  
或有可取謹列諸書之言有及於幾微者于左  
謹理欲之初分

大學曰所謂誠其意者毋自欺也如惡惡臭如好好色

此之謂自謙故君子必慎其獨也

謙讀為慊

朱熹曰誠其意者自修之首也毋者禁止之辭自欺云者知為善以去惡而心之所發有未實也謙快也足也獨者人所不知而已所獨知之地也言欲自修者知為善以去其惡則當實用其力而禁止其自欺使其惡惡則如惡惡臭好善則如好好色皆務決去而求必得之以自快足於已不可徒苟且以徇外而

為人也然其實與不實蓋有他人所不及知而已獨知之者故必謹之於此以審其幾焉

臣按誠意一章乃大學一書自修之首而慎獨一言又誠意一章用功之始章句謂謹之於此以審其幾所謂此者指獨而言也獨者人所不知而已所獨知之地也蓋以學者用功於致知之際則固已知其心之所發有善有惡矣亦固已知其善之當為而惡之當去矣然其一念始發於心須臾之



頃端緒之初有實焉有不實焉蓋有他人所不及  
知而已所獨知者是則所謂獨也是乃人心念慮  
初萌動之端善惡誠偽所由分之始甚細微而幽  
隱也學者必審察於斯以實為善而去惡譬如人  
之行路於其分歧之處舉足不差自此而行必由  
乎正道否則差毫釐而繆千里矣大學釋誠意指  
出慎獨一言示萬世學者以誠意之方章句論慎  
獨指出幾之一言示萬世學者以慎獨之要人能

於此幾微之初致審察之力體認真的發端不差  
則大學一書所謂八條目者皆將為己有矣不然  
頭緒茫茫竟無下手之處各隨所至而用功待其  
既著而致力則亦泛而不切勞而少效矣臣謹補  
入審幾微一節以為九重獻伏惟宮闈深邃之中  
心氣清明之際澄神定慮反己靜觀察天理人欲  
之分致擴克遏絕之力則敬畏於是乎崇逸欲於  
是乎戒由是以制事由是以用人由是以臨民堯

舜之君復見於今泰和之治不在於古矣臣不勝  
惓惓

中庸曰莫見乎隱莫顯乎微故君子慎其獨也

朱熹曰幽暗之中細微之事跡雖未形而幾則已動  
人雖不知而已獨知之則是天下之事無有著見明  
顯而過於此者是以君子既常戒懼而於此尤加謹  
焉所以遏人欲於將萌而不使其潛滋暗長於隱微  
之中以至離道之遠也

臣按大學中庸二書皆以慎獨為言朱氏章句於大學慎獨曰審其幾中庸慎獨曰幾則已動先儒謂一幾字是喫緊為人處也夫所謂獨者豈出於隱微之外哉隱微是人之所不睹不聞而我所獨睹獨聞之處也向也戒懼乎己之所不睹不聞是時猶未有其幾也雖有其幾未動也今則人雖不睹不聞而已則有所睹有所聞矣己所獨睹獨聞者豈非其幾乎幾已動矣而人猶未之知人雖未

知而我已知之則固已甚見而甚顯矣此正善惡之幾也於其幾動之處而致其謹焉戒慎乎其所初睹恐懼乎其所初聞方其欲動不動之間已萌始萌之際審而別之去其惡而存其善慎而守之必使吾方寸之間念慮之際絕無一毫人欲之萌而純乎義理之發則道不須臾離於我矣

易曰幾者動之微吉之先見者也

漢書吉之之間有山字今從之

程頤曰所謂幾者始動之微也吉凶之端可先見而

未著者也

臣按大易幾者動之微一言乃萬世訓幾字之始  
蓋事理之在人心有動有靜靜則未形也動則已  
形也幾則是動而未形在乎有無之間最微細而  
難見故曰動之微雖動而未離於靜微而未至於  
著者也此是人心理欲初分之處吉凶先見之兆  
先儒所謂萬事根源日用第一親切工夫者此也  
大舜精以察之顏子有不善未嘗不知皆於此著

力焉方其一念初萌之始即豫有以知其善惡之  
幾知其為善也善者吉之兆斷乎可為則為之必  
果知其為惡也惡者凶之兆斷乎不可為則去之  
不疑則其所存所行皆善而無惡而推之天下國  
家成事務而立治功罔有所失矣

孟子曰惻隱之心仁之端也羞惡之心義之端也辭讓  
之心禮之端也是非之心智之端也凡有四端於我者  
知皆擴而克之矣若火之始然泉之始達苟能克之足

以保四海

朱熹曰惻隱羞惡辭讓是非情也仁義禮智性也端緒也因其情之發而性之本然可得而見猶有物在中而緒見於外也四端在我隨處發見即此推廣而充滿其本然之量則其日新又新將有不能自己者矣

又曰四端是始發處端訓始字尤切如發端履端開端之類皆始也凡有四端若火始然泉始達始然便



是火之端始達便是水之端

臣按人心初動處便有善惡之分然人心本善終是善念先生少涉於情然後方有惡念耳是以見孺子入井者即有怵惕之心見人蒙不潔者即有憎惡之心二者皆是情也而實由乎其中有仁義之性故其始初端緒發見於外自然如此也四端在人者隨處發見人能因其發念之始幾微纔見端緒畧露即加研審體察以知此念是仁此念是

義此念是禮或是智於是擴而克之由惻隱之端而克之以為不忍人之仁由羞惡之端而克之以為不勝用之義與夫辭讓是非皆然則凡所為者溥博淵泉而時出之矣孟子所謂端與大易所謂幾皆是念慮初生之處但易兼言善惡孟子就性善處言爾是故幾在乎審端在乎知既知矣又在乎能擴而克之知而不克則是徒知而已然非知之於先又曷以知其為善端而克之哉此君子所

以貴乎窮理也

通書曰幾善惡又曰動而未形有無之間者幾也

又曰不思則不能通微不睿則不能無不通是則無不通生於通微通微生於思故思者聖功之本而吉凶之機也

朱熹曰幾者動之微善惡之所由分也蓋動於人心之微則天理固當發見而人欲亦已萌乎其間矣或問幾如何是動靜之間曰似有而未有之時在人識

之爾

又曰一念起處萬事根源尤更緊切

又曰幾有善惡之分於此之時宜常窮察識得是非其初乃毫忽之微至其窮察之久漸見克越之大天然有箇道理開裂在這裏此幾微之決善惡之分也若於此分明則物格而知至知至而意識意誠而心正身修家齊國治天下平自己不得止不住

又曰幾是動之微是欲動未動之間便有善惡須就

這處理會若至於發著之甚則亦不濟事矣所以聖賢說戒慎乎其所不睹恐懼乎其所不聞又說慎其獨都是要就這幾微處理會幾微之際大是切要

又曰微動之初是非善惡於此可見一念之生不是善便是惡

又曰幾微之間善者便是天理惡者便是人欲纔覺如此存其善去其惡可也

又曰周子極力說箇幾字儘有警發人處近則公私

邪正遠則廢興存亡只於此處看破便幹轉了此是  
日用第一親切工夫精粗隱顯一時穿透堯舜所謂  
惟精惟一孔子所謂克己復禮便是此事食芹而美  
甚欲獻之吾君

又曰天理人欲之分只爭這些子故周子只管說幾  
字然辨之不可不早故橫渠每說豫字

臣按宋儒周惇頤因易幾者動之微一言而著之  
通書者為詳朱熹因周氏之言而發明之者尤為

透徹即此數說觀之則幾之義無餘蘊矣至其用功之要則惇頤所謂思張載所謂豫熹於大學章句所謂審者尤為著力處也誠能於其獨知之地察其端緒之微而分別之擴克其善而遏絕其惡則治平之本於是乎立作聖之功於是乎在矣

以上謹理欲之初分

審幾微

察事幾之萌動

易曰夫易聖人之所以極深而研研猶審也幾也惟深也故

能通天下之志惟幾也故能成天下之務

臣按周易此言雖為易書而發然於人君圖治之道實切要焉蓋事幾之在天下無處無之而在人君者一日二日之間其多乃盈於萬是所以研審其幾微之兆以成天下之務者豈他可比哉先儒朱熹謂深就心上說幾就事上說深在心甚玄奧幾在事半微半顯請即君身言之人君一心淵奧



靜深誠有不可測者然其中事事皆備焉事之具也各有其理事之發也必有其端人君誠能於其方動未形之初察於有無之間審於隱顯之際端倪始露豫致其研究之功萌芽始生即加夫審察之力由是以釐天下之務御天下之人應天下之變審察於其先圖謀於其易天下之務豈有難成也哉

知幾其神乎君子上交不諂下交不瀆其知幾乎

程頤曰見事之幾微者其神妙矣乎君子上交不至於諂下交不至於瀆者蓋知幾也不知幾則至於過而不已交於上以恭巽故過則為諂交於下以和易故過則為瀆君子見於幾微故不至於過也所謂幾者始動之微也吉凶之端可先見而未著者也

臣按先儒朱熹謂事未至而空言其理也易見事已至而理之顯然者亦易見惟事之方萌而動之微處此最難見噫此知幾者所以惟神明不測者

能之也歟君子交於上則不諂所以不諂者知諂之流弊必至於屈辱也交於下則不瀆所以不瀆者知瀆之末流必至於欺侮也故於其初動未形之時而審之則知上交者不可諂下交者不可瀆也在人君者雖無上交然人臣有諂諛之態則於其初見之始即抑絕之不待其著見也至於交接臣下之際尤當嚴重稍有一毫狎瀆之意則已毅然戒絕之是亦知幾者矣

君子見幾而作不俟終日易曰介于石不終日貞吉介如石焉寧用終日斷可識矣君子知微知彰知柔知剛萬夫之望

程頤曰君子明哲見事之幾微故能其介如石其守既堅則不惑而明見幾而動豈俟終日也斷別也其判別可見矣微與彰柔與剛相對者也君子見微則知彰矣見柔則知剛矣知幾如是衆所仰也故曰萬夫之望

胡寅曰陰陽之運天地之化物理人事之始終皆自  
茫忽毫釐至於不可禦故修德者矜細行圖治者憂  
未然堯舜君臣反覆警省未嘗不以幾為戒故折句  
萌則百尋之木不能成矣忽蟻穴則千丈之隄不能  
固矣君子所以貴於見幾而作也

臣按天下之事莫不有幾惟其知之豫也然後能  
戒之於早而不至於暴著而不可遏苟在已者見  
道有未明立志有不堅臨事而不暇致思雖思而

不能審處故幾未至也則暗昧而不知幾既見也則遲疑而不決是以君子貴乎明哲而定靜明哲則中心無所惑而灼有所見於善惡未分之初定靜則外物不能動而確有所守於是非初分之際見微而知其彰不待其昭著也見柔而知其剛不待其堅凝也所以然者亦惟在乎格物以致其知知止而后有定定而靜靜而安安而慮慮而至於能得如此則無不知之幾不俟終日而判斷矣然

此非特可為萬夫之望則雖如神之聖殆亦可幾也乎

象曰天與水違行訟君子以作事謀始

程頤曰天上水下相違而行二體違戾訟之由也若上下相順訟何由興君子觀象知人情有爭訟之道故凡所作事必謀其始

朱熹曰作事謀始訟端絕矣

項安世曰乾陽生於坎水坎水生於天一乾坎本同

氣而生者也一動之後相背而行遂有天淵之隔由是觀之天下之事不可以細微而不謹也不可以親暱而不敬也禍亂之端夫豈在大曹劉共飯地分於七箸之間蘇史滅宗忿起於笑談之頃謀始之誨豈不深切著明乎

都潔曰天為三才之始水為五行之始君子法之作事謀始

臣按先儒謂天左旋而水東注違行也作事至於



違行而後謀之則無及矣是故君子體易之象凡  
有興作必謀其始焉何則理在天地間大中至正  
無有偏枉從之而行則上下相順違之而行則彼  
此交逆是以君子一言之將發也一行之將動也  
一事功之將施行也則反之於己體之於人揆之  
於心繹之於理順乎逆乎順則徐為之逆則亟止  
之不待發於聲徵於色見於施為以作過取愆啓  
爭構訟而貽異時之悔是則所謂謀始也謀之又

謀必事於理不相悖人與我不相妨前與後不相  
衡決上與下不相齟齬然後作之則所行者無違  
背之事矣事無違行則凡所云為舉錯者皆合於  
天理順於人心又安有紛紛之口語信信之訟言  
乎或曰興訟構獄官府之事也朝廷之於民直驅  
之而已彼將誰訟乎吁上之於下勢不同而理同  
下之於上不敢言而敢怒民之訟於心也甚於其  
訟於口也民之訟於天也甚於其訟於官也仁智

之君誠畏天謹畏民怒凡有興作惡可不謀於始乎

虞書兢兢業業一日二日萬幾

蔡沈曰幾微也易曰惟幾也故能成天下之務蓋禍亂之幾藏於細微而非常人之所豫見及其著也則雖智者不能善其後故聖人於幾則兢兢業業以圖之所謂圖難於其易為大於其細者此也一日二日者言其日之至淺萬幾者言其幾事之至多也蓋一日二

日之間事幾之來且至萬焉是可一日而縱欲乎

臣按天下之事必有所始其始也則甚細微而難見焉是之謂幾非但禍亂有其幾也而凡天下萬事萬物莫不有焉人君於其幾而審之事之未來而豫有以知其所將然事之將來而豫有以知其所必然於其幾微之始致其審察之功夫善歟則推而大之果惡歟則遏而絕之則善端於是而擴克惡念於是乎消殄逸欲無自而生禍亂無由而

起夫如是吾身之不修國家之不治理未之有也  
苟不先審其微待其暴著而後致力焉則亦無及  
矣此古之帝王所以兢兢業業致審於萬事幾微  
之初也歟

禹曰都帝慎乃在位帝曰俞禹曰安汝止惟幾惟康  
蔡沈曰天位惟艱一念不謹或以貽四海之憂一日  
不謹或以致千百年之患帝深然之而禹又推其所  
以謹在位之意曰安汝止也止者心之所止也安之

云者順適乎道心之正而不陷於人欲之危也惟幾所以審其事之發惟康所以省其事之安

臣按幾者動之微動者幾之著方其靜而未動也未幾也幾既動而後事始萌由是漸見於形象而事成焉苟於幾微之初不知所審而欲其事為之著得其安妥難矣臣愚以為惟幾者又惟康之本也人君慎其在位而必欲得其庶事之康非審於事幾發動之初曷由得哉

帝庸作歌曰勅天之命惟時惟幾

蔡沈曰勅戒勅也幾事之微也惟時者無時而不戒  
勅也惟幾者無事而不戒勅也蓋天命無常理亂安  
危相為倚伏今雖治定功成禮備樂和然頃刻謹畏  
之不存則怠荒之所自起毫髮幾微之不察則禍患  
之所自生不可不戒也

臣按此章帝舜將欲作歌而先述其所以歌之意  
也歌之序意在乎戒天命而謹時幾時以天時言

幾以人事言無一時而不戒勅以無一時而非天命之所寓也無一事而不戒勅以無一事而非天命之所存也然謂之事可也而謂之幾者何哉先儒謂幾者事之微也方其事之始萌欲動未動之際方是之時善惡之形未分也而豫察其朕兆是非之情未著也而豫審其幾微毫末方起已存戒謹之心萌芽始茁已致防範之意不待其滋長顯露而後圖之也古之帝王所以戒勅天命也如此



其至所以禍亂不興而永保天命也歟後世人主  
不知戒勅天命故雖事幾暴著猶不知省及至禍  
機激發始思所以圖之亦末如之何矣噫幾之一  
言虞廷君臣累累言之是誠萬世人君勅天命保  
至治之樞要也惟明主留意

周書嗣若功王乃初服嗚呼若生子罔不在厥初生自  
貽哲命今天其命哲命吉凶命厯年知今我初服宅新  
邑肆惟王其疾敬德

朱熹曰王之初服不可不謹其習猶子之初生不可不慎其初所教蓋習于上則智習于下則愚矣故今天命正在初服之時敬德則哲則吉則歷年不敬則愚則凶則短折也

蔡沈曰嗣其有功者謂繼其能敬德而歷年者也況王乃新邑初政服行教化之始乎又歎息言王之初服若生子無不在於初生習為善則善矣自貽其哲命為政之道亦猶是也

陳櫟曰明哲之性與生俱生初生之時習於善則明  
可作哲習於惡則靡哲不愚哲則為天所命愚則天  
不命焉是自貽哲命如所謂自求多福此所謂無不  
在其初生時自貽哲命者王之初服亦猶是也王乃  
初服之時天命之或吉或凶判於此王德之或敬或  
否判於此敬則能祈天永命不敬則不能祈天永命  
召公欲王乘此一初之機而疾敬德疾之云者欲其  
乘此機而速勉之有今罔後之謂也

臣按天下之事莫不有其初家之立教在子生之初國之端本在君立之初蓋事必有所從起之處於所從起之處而豫為之區處則本原正而支派順矣所從起之處即所謂初也有一事即有一初是以周公告成王以宅新邑為服行教化之初也雖然豈但宅邑一事哉周公偶因所遭以告其君耳是故人君知事之皆必有其初也於其所服行之始而審其所發動之幾當其端緒肇啓之時豫

為終竟據守之地即其始以占其終即其微而究其著即其近以慮其遠即其易以圖其難兢兢焉惟德之是敬汲汲焉惟日之不足是則所以自貽厥命者於德為明哲於事為吉祥在身有壽考之徵在國有過歷之祚孰謂人君為治不本於一初而其所以謹於其初者又豈外於一敬哉

詩鶴鳴首章曰鶴鳴于九皋聲聞于野又曰鶴鳴于九皋聲聞于天

朱熹曰鶴之鳴高亮聞八九里皋澤中水溢出所為坎從外數至九喻深遠也鶴鳴于九皋而聲聞于野言誠之不可揜也

臣按本朝學士朱善曰知誠之不可揜則知念慮方萌而鬼神已知形迹欲掩而肺肝已見所以不可無誠身之功也臣以是知天下萬事萬物之理不出乎一誠誠者何實理也實有是形則實有是影實有是器則實有是聲如此詩言鶴之鳴也在

乎九折之澤至深至遠之處而其聲也乃聞於郊  
野虛空至高至大之間如人之有為也在乎幽深  
隱僻之地宜若人不知矣然其發揚昭著於外者  
乃無遠而不至焉是何也有是實事於中則有是  
實聲於外誠之不可揜也世之人主每於深宮之  
中有所施為亦自知其理之非也不勝其私欲之  
蔽乃至冒昧為之遮藏引避惟恐事情之彰聞戒  
左右之漏泄忌言者之諷諫申之以切戒禁之以

嚴刑卒不能使之不昭灼者此蓋實理之自然不  
得不然如鶴鳴而聲自聞也嗟乎天下之事有可  
為者有不可為者可為者必可言也不可言者必  
不可為也可為而不可言則非可為者矣人君於  
此凡其一念之興幾微方動則必反思於心曰吾  
之為此事可以對人言否乎可以與人言則為之  
不可與人言則不為則所為者無非可言之事若  
然則吾所為者惟恐人傳播之不遠矣尚何事於



籍人口而罪人之議已也哉

禮記曰禮之教化也微其止邪也於未形使人日徙善  
遠罪而不自知也是以先王隆之也易曰君子慎始差  
若毫釐繆以千里此之謂也

引易今經  
文無之

葉夢得曰微者形而未大也教以使人微化以使人  
遷故從善而不自知未形者有形之兆也止邪於將  
兆則人知舍彼以就此故遠罪而不自知

吳澂曰禮之導人為善每在善幾方動之初其禁人

為惡亦在惡幾未見之時非若其他法令刑罰之屬  
待其顯見而後勸率懲遏之也又引易以證之始謂  
其初未顯未見之時慎謂宜及此時以禮導其善防  
其惡不可失此幾也儻或不然不於其始而教之止  
之其差雖若毫髮之近至於既顯既見而後教之止  
之則難為力其繆乃有千里之遠言其繆甚大也

臣按先王為治而必隆重於禮者蓋以禮為教化  
之本所以遏民惡念而啓其善端約之於仁義道

德之中而使其不蕩於規制法度之外以至於犯  
戒令罹刑憲焉自有不知其所以然而然者矣則  
其為教化也不亦微乎微者幾之初動未大者也  
君子於其幾微方動未形之始而慎之慎之何如  
亦隆禮而已矣是故知男女之有欲也則制婚禮  
以止其淫辟之行於情實未開之先知飲食之易  
爭也則制鄉飲以止其爭鬪之獄於朶頤未動之  
始制喪祭之禮以止其倍死忘生之念於哭臨奠

獻之際制聘覲之禮以止其倍畔侵陵之患於玉帛俎豆之間是皆不待欲動情勝之時而自有潛銷速化之妙縱有過差不遠而復尚何差繆而至於千里之遠絕乎

子曰不曰如之何如之何者吾末如之何也已矣

朱熹曰如之何如之何者熟思而審處之辭也不如是而妄行雖聖人亦無如之何矣

臣按先儒有言善為天下國家者謹於微而已矣

謹微之道在於能思是以欲興一念作一事取一物用一人必於未行之先欲作之始反之於心反覆紬繹至再至三慮其有意外之變恐其有必至之憂如何而處之則可以盡善如何而處之則可以無弊如何而處之則可以善後而久遠皆於念慮初萌之先事幾未著之始思之必極其熟處之必極其審然後行之如此則不至於倒行逆施而收萬全之功矣苟為不然率意妄行徒取一時之

快而不為異日之圖一旦馴致於覆敗禍亂無可奈何之地雖聖人亦將奈之何哉是故君子之行事也欲防微而杜漸必熟思而審處

司馬光曰書曰一日二日萬幾何謂萬幾幾之為言微也言戒懼萬事之微也夫水之微也捧土可塞及其盛也漂木石沒丘陵火之微也勺水可滅及其盛也焦都邑燔山林故治之於微則用力寡而功多治之於盛則用力多而功寡是故聖帝明王皆銷患於未萌弭禍於

未形天下陰被其德而莫知其所以然也又曰未然之言常見棄忽及其已然又無所及夫宴安怠惰肇荒淫之基奇巧珍玩發奢泰之端甘言悲詞啓僥倖之塗附耳屏語開讒賊之門不惜名器導僭逼之源假借威福授陵奪之柄凡此六者其初甚微朝夕狎玩未覩其害日滋月益遂至深固比知而革之則用力百倍矣

臣按宋仁宗時司馬光上五規其四曰重微其中引孔子告魯君之語謂昧爽夙興正其衣冠平旦

視朝慮其危難一物失理亂亡之端以此思憂則  
憂可知矣蓋人君惟不知憂也故不知所慮當夫  
安逸之時知有亂亡之禍則必憂之矣憂之則慮  
之慮之於無事之時而尋其端緒之所自起究其  
流弊之所必至如光所言之六事者觸類而長之  
隨機而應之逆料其未然之害遠探其將至之患  
千里之外如在目前百年之遠如在旦夕事事而  
思之惟恐一物之失理汲汲而已之惟恐須臾之



尚在不玩狎而因循不苟且而姑息惕然而常警  
於心毅然而必致其決凜然而深懼其危如此則  
修之於廟堂而德冒四海治之於今日而福流萬  
世誠有如光之所以期其君者尚何危難之有哉  
以上察事幾之萌動

審幾微

防姦萌之漸長

坤初六履霜堅冰至象曰履霜堅冰陰始凝也馴致其

道至堅冰也文言曰積善之家必有余慶積不善之家  
必有余殃臣弑其君子弑其父非一朝一夕之故其所  
由來者漸矣由辯之不早辯也易曰履霜堅冰至蓋言

順也

順當作慎

程頤曰陰之始凝而為霜履霜則當知陰漸盛而至  
堅冰矣猶小人始雖甚微不可使長長則至於盛也  
又曰天下之事未有不由積而成家之所積者善則  
福慶及於子孫所積不善則災殃流於後世其大至

於弑逆之禍皆因積累而至非朝夕所能成也明者則知漸不可長小積成大辯之於早不使順長故天下之惡無由而成乃知堅冰之戒也

臣按辯之於早即所謂審微也坤卦此爻陰始生於下其端甚微而其勢必至於盛其象如人之初履霜也則知其為陰氣之凝夫陰氣之始凝也但結為微薄之霜耳馴而至於極盛且將為堅厚之冰焉大凡國家禍亂之變弑逆之故其原皆起於

小人誠能辨之於早慎之於微微見其萌芽之生  
端緒之露即有以抑遏壅絕之不使其有滋長積  
累之漸以馴致夫深固堅牢之勢則用力少而禍  
亂不作矣聖人作易以此垂戒示人以扶陽抑陰  
之意蓋陽為君子陰為小人小人之初用也未必  
見其有害然其質本陰柔用之之久馴致之禍有  
不能免者人君知其為小人也則於初進之際窺  
見其微即抑之黜之不使其日見親用則未萌之

禍消矣夫然又安有權姦竊柄之禍佞倖盡心之害哉

大畜六四童牛之牯元吉

童者未角之稱牯施橫木於牛角以防其觸者也

六

五豮豕之牙吉

攻其特而去之曰豮所以去其勢也

程頤曰初居最下陽之微者微而畜之則易制猶童牛而加牯大善而吉也蓋人之惡止於初則易既盛而後禁則扞格而難勝莫若止之於初也又曰豕剛躁之物而牙為猛利若強制其牙則用力勞而不能

止其躁猛若殲去其勢則牙雖存而剛躁自止其用如此所以吉也君子法殲豕之義知天下之惡不可以力制也則察其機持其要塞絕其本原故不假刑罰嚴峻而惡自止也

臣按易之大畜此二爻誠人君制惡之要術也人君之於小人誠能察之於其微知其不可用制之於早使其不敢肆操之有要使彼自戢止則天下國家又安得有莽鋏之禍覽節之患哉君子所以

貴乎炳幾先也不然則無以知其為小人將馴致於權不可收勢不可遏之地矣可不戒哉

姤初六繫于金柅

柅止車之物止之以堅強之金柅

貞吉

靜正則吉

有攸往

見凶

往而進見之則凶

羸豕孚蹢躅

羸弱之豕中心之誠在乎蹢躅跳躑也

程頤曰姤陰始生而將長之卦一陰生則長而漸盛陰長則陽消小人道長也制之當於其微而未盛之時君子小人異道小人雖微弱之時未嘗無害君子之心防於微則無能為矣

又曰如李德裕處置近倖徒知其帖息畏伏而忽於志不忘逞照察少不至則失其幾也

臣按先儒有言豕方羸時力未能動然至誠在于蹢躅得伸則伸矣如唐武宗時李德裕為相君臣契合莫能間之近倖帖息畏伏誠若無能為者而不知其志在求逞也其後繼嗣重事卒定於其手而德裕逐矣幾微之間所當深察雖然易之言又不特為君子小人設也吾心天理人欲之幾亦若



是焉人欲之萌蓋有甚於羸豕之可畏者能於此而止之而不使其滋長則善矣臣愚以為吾心私欲竊伏之幾尤甚於小人帖息求逞之幾必先有以防乎已然後可以防乎人也此又卦爻言外之意

詩小弁莫高匪山莫浚匪泉君子無易由言耳屬於垣朱熹曰山極高矣而或陟其巔泉極深矣而或入其底故君子不可易於其言恐耳屬於垣者有所觀望

左右而生讒譖也

呂祖謙曰唐德宗將廢太子而立舒王李泌諫之且曰願陛下還宮勿露此意左右聞之將樹功於舒王太子危矣此正君子無易由言耳屬于垣之謂也

臣按李泌諫德宗曰勿露此意所謂此意之露即是幾微初動之處也意在言前又不但若詩所謂無易由言而已也小人非惟聽吾言之所發有所觀望而生讒譖亦且伺吾意之所向有所予奪而

竊權柄是以人君於凡施為舉動如命官討罪之類皆當謹之於幾微之先不可輕露其意使小人得以窺測之苟或一露其幾則將有貪天功以為己私假上權以張己威樹功於人收恩於己者矣不獨如李泌所謂建儲一事也

通鑑初命晉大夫魏斯趙籍韓虔為諸侯

司馬光曰事未有不始於微而成於著聖人之慮遠故能謹其微而治之衆人之識近故必待其著而後

救之治其微則用力寡而功多救其著則竭力而不能及也

胡寅曰善為天下國家者謹於微而已矣卑宮惡服慮侈汰也不遑暇食防逸豫也慄慄危懼戒驕溢也動守憲度虞禍亂也不為嗜欲則娛樂之言無自進不好功利則興作之計無自生嘖笑不苟誰敢矯假八柄在己誰擅威福誠如是雖使六卿復起三家輩作操

曹操懿司馬

莽

王莽

溫

朱溫

接踵於朝方且效忠宣力

之不暇而何有於他志是故韓趙魏之為諸侯孔子所謂吾末如之何者人君監此亦謹於微而已矣

臣按三晉欲剖分宗國非一日矣至是魏斯趙籍韓虔始自裂土而南面焉周雖不命其能禁其自侯哉原其所起之由先儒謂始自悼公委盟會於大夫平公受貨賂於崔杼荀躒出會三臣內叛陰凝冰堅垂及百年矣是以君子臨事貴於見幾作事貴於謀始為大於其細圖難於其易勿謂無害

其禍將大勿謂無傷其禍將長

以上防姦萌之漸長

審幾微

炳治亂之幾先

五子之歌曰怨豈在明不見是圖

臣按蔡沈謂民心怨背豈待其彰著而後知之當於事幾未形之時而圖之也嗟乎使世之居人上者皆能圖無形之怨則天下豈有亂亡之禍哉惟

其不能圖也耳目蔽於左右心志隔於上下見者  
尚不能圖況不見乎明者尚不能知況未明乎圖  
之之道奈何曰民之所好者逸樂也吾役而勞之  
民雖未懟也吾則思曰力窮則懟民之情也豫於  
事役將興之初度其緩急而張弛焉不待其形於  
言也民之所急者衣食也吾征而取之民雖未怨  
也吾則思曰財窮則怨民之心也豫於稅斂於民  
之始量其有無而取舍焉不待其徵於色也凡有

興作莫不皆然則民無怨背之心而愛戴其上如  
父母矣噫察民怨也於冥冥之中弭民怨也於涓  
涓之始古之帝王所以得民心而保天下者如此  
後世人君則不然視民如暗見如不見此其所以  
上下相戕而禍亂相仍也歟

周官王若曰若昔大猷制治於未亂保邦於未危

臣按大猷謂大道之世也若昔大道之世制治保  
邦於未亂未危之前所以常治而常安也若待其



既亂既危而後制之保之則已無及矣然則其道  
何由亦曰審幾而已矣蓋天下國家有治則有亂  
有安則有危然亂不生於亂而常生於治之時危  
不起於危而常起於安之日惟人君恃其久安而  
狃於常治也不思所以制之保之於是亂生而危  
至矣人君誠能於國家無事之時審其幾先兢兢  
然業業然恒以治亂安危為念謀之必周慮之必  
速未亂也而豫圖制亂之術未危也而豫求扶危

之人則國家常治而不亂君位常安而不危矣蔡  
沈解此謂所以制治保邦者即下文文明王立政是  
也而臣以審幾為言者竊以謂人君能於未亂未  
危之前審其事幾之所始以防其末流之所終則  
永無危亂之禍矣其於制治保邦之道似為切要  
惟聖明留意

易象曰水在火上既濟君子以思

思之於後

患而豫

為之於前

防

之

唐書玄宗天寶末安祿山反入關帝獨與貴妃姊妹  
皇子妃主皇孫及親近宦官宮人出延秋門妃主皇  
孫之在外者皆委之而去至咸陽望賢宮日向中帝  
猶未食民獻糲飯雜以麥豆皇孫輩爭以手掬食之  
須臾而盡有老父郭從謹進言曰在廷之臣以言為  
諱闕門之外陛下皆不得知草野之臣必知有今日  
久矣但九重嚴邃區區之心無路上達事不至此臣  
何由得覩陛下之面而訴之乎帝曰朕之不明悔無

所及慰諭而遣之命軍士散詣邨落求食夜將半乃至金城縣縣民皆走驛中無燈火人相枕藉而寢賤無以復辨宋儒范祖禹曰上下之等以勢相扶而已矣天子以一身而寄天下之上合而從之則為君離而去之則為匹夫明皇享國幾五十年一旦失國出奔不四十里而已無食天子之貴四海之富其可恃乎

德宗建中四年涇原兵過京師作亂帝召禁兵禦賊

無一人至者乃與太子諸王公主自苑北門出宦官  
左右從者僅百人後宮諸王公主不及從者什七八  
遂幸奉天賊登含元殿爭入府庫運金帛時朱泚間  
居賊迎入宮僭號稱大秦皇帝帝時在奉天經月城  
中資糧俱盡嘗遣健步出城覘賊其人懇以苦寒乞  
一襦袴帝為求之不獲竟憫默而遣之時供御纔有  
糲米二斛每伺賊間夜縋人於城外采蕪菁根而進  
之

宋史徽宗末年金人分道南侵將逼京師乃傳位欽  
宗靖康元年金人自真定趨汴屯于城下京師遂陷  
金人欲邀徽宗出郊欽宗乃代其往遂如青城金人  
索金一千萬錠銀二十萬錠帛一千萬匹於是大括  
金銀金人逼欽宗易服既而又欲徽宗至青城面議  
且以內侍所具諸王皇孫妃主名盡取之徽宗即與  
其后同如青城鄆王楷及諸妃公主駙馬及六宮有  
位號者皆從凡法駕鹵簿皇后以下車輅冠服禮器

法物八寶九鼎等物及官吏內人內侍技藝工匠倡優府庫蓄積為之一空

臣按程頤有言時當既濟惟慮患害之生故思而豫防使不至於患也自古天下既濟而致禍亂者蓋不能思患而豫防也何也蓋物極則反勢至則危理極則變有必然之理也人君於此思其未萌之患慮其末流之禍展轉於心胸之間圖謀於思慮之際審之於未然遏之於將長曲盡其防閑之

術旁求夫消弭之方毋使一旦底於不可救藥無  
可奈何之地則禍患不作而常保安榮矣先儒有  
言成湯之危懼成王之悶惑皆思患豫防之謂也  
後世人主若唐玄宗德宗宋之徽宗皆恃其富盛  
而不謹於幾微遂馴致於禍亂而不可支持之地  
謹劉子篇以垂世戒若夫叔季之君未致於既濟  
之時而罹禍亂者則不載云臣嘗因是而通論之  
自古禍亂之興未有不由微而至著者也人君惟



不謹於細微之初所以馴致於大亂極弊之地彼其積弊之後衰季之世固其宜也若夫當承平熙洽之餘享豐亨豫大之奉肆其胸臆信任匪人窮奢極欲無所不至一旦失其富貴尊榮之勢而為流離困厄之歸是豈無故而然哉其所由來必有其漸良由不能慎之於始審之於微思其所必至之患而豫先有以防之也此三君者皆有過人之才當既濟之時不能防微謹始思患而豫防之以

馴致夫困苦流離之極有不忍言者吁可不戒哉  
可不戒哉臣故因大易思患豫防之象而引三君  
之事以實之而著於審幾微之末以垂萬世之戒  
後世人主尚鑒于茲兢兢業業謹之於微毋使一  
旦不幸而蹈其覆轍焉豈彼一時一人之幸其實  
千萬世億兆之人之幸也

以上炳治亂之幾先

大學衍義補卷首

# 欽定四庫全書

子部

大學衍義補卷一  
一至三

詳校官中書臣秦瀛

侍讀臣孫球覆勘

總校官編修臣王燕緒

校對官中書臣吳甸華

謄錄舉人臣張曾秀

欽定四庫全書

大學衍義補卷一

明 丘濬 撰

治國平天下之要

正朝廷

總論朝廷之政

臣按宋儒真德秀大學衍義格物致知之要  
既有所謂審治體者矣而此治國平天下之

要又有正朝廷而總論朝廷之政何也蓋前之所審者治平之體言其理也此之所論者治平之政言其事也一主於知一主於行蓋必知於前而後能行於後後之行者即所以實其前之知者也理與事知與行其實互相資焉

易曰天地之大德曰生聖人之大寶曰位何以守位曰仁何以聚人曰財理財正辭禁民爲非曰義

朱熹曰天地以生物爲心蓋天地之間品物萬形各有所事唯天則確然於上地則隤然於下一無所爲只以生物爲事故易曰天地之大德曰生

郭雍曰天地以生物爲德故人以大德歸之聖人得崇高之位然後成位乎中而贊化育故以位爲大寶也大寶者亦非聖人自以爲寶也天下有生幸聖人之得位以蒙其澤故天下以爲寶也

蘇轍曰人之所同好者生也所同貴者位也所同欲

者財也天下之大情盡於此矣此三者常相爲用生  
者人之本也無財則無以生無位則無以養生而理  
財作易者蓋知此矣既言三者而參之以仁義其旨  
蓋有在矣

吳澂曰生生不已者天地之大德然天地生物生人  
又生與天地合德之聖人命之居君師之位爲人物  
之主而後能使天地之所生得以各遂其生也苟或  
但有其德而無其位則亦不能相天地而遂人物之

生故位爲聖人之大寶大寶謂大可貴重守謂保有之

臣按人君所居之位極崇高而至貴重天下臣民莫不尊戴譬則至大之寶也人君居聖人大寶之位當體天地生生之大德以育天地所生之人民使之得所生聚然後有以保守其莫大之位焉然人之所以生必有所以養而後可以聚之又在乎生天下之財使百物足以給其用有以爲聚居衣



食之資而無離散失所之患則吾大寶之位可以  
長保而有之矣然有財而不能理則民亦不得而  
有之所謂理財者制其田里教之樹畜各有其有  
而不相侵奪各用其用而無有虧欠則財得其理  
而聚矣所謂正辭者辨其名實明其等級是是非  
非而有所分別上上下下而無有混殽則辭得其  
順而正矣既理財正辭而民有趨於利而背於義  
者又必憲法令致刑罰以禁之使其于財也彼此

有無之間不得以非義相侵奪其於辭也名號稱  
謂之際不得以非義相紊亂與凡貴賤長幼多寡  
取予之類莫不各得其宜焉是則所謂義也吁聖  
人體天地生生之仁盡教養斯民之義孰有加於  
此哉先儒謂易之事業盡於此三言者臣愚以為  
人君受天地之命居君師之位所以體天地而施  
仁立義以守其位者誠不外乎此三者而已謹載  
大易此言於總論朝廷之政之首以為大寶之獻

書舜典詢

謀也

于四岳

四岳官名一人而總四方諸侯之事

闢也

四門明四

目達四聰

朱熹曰

書傳雖蔡沈作然二典禹謨皆其師朱熹是正今做真氏讀書記標其師名

舜既

告廟即位乃謀治於四岳之官開四方之門以來天下之賢俊廣四方之視聽以決天下之壅蔽

臣按人君以一人之身居四方之中東西南北咸於此焉取正者也一身之精神有限耳目之見聞不周人不能盡識也事不能盡知也故必擇大臣

而信任之俾其蒐訪人才疏通壅蔽時加詢謀以  
求治焉夫朝廷之政其弊端之最大者莫大乎壅  
蔽所謂壅蔽者賢才無路以自達下情不能以上  
通是也賢才無路以自達則國家政事無與共理  
天下人民無與共治下情不能以上通則民間利  
病無由而知官吏臧否無由而聞天下日趨於亂  
矣昔唐玄宗用李林甫爲相天下舉人至京師者  
林甫恐其攻己短請試之一無所取乃以野無遺

賢爲賀楊國忠爲相南詔用兵敗死者數萬人更  
以捷聞此後世人主用非其人不能闢四門明四  
目達四聰之明效也遂致天寶之亂唐室自此不  
振以至於亡臣愚竊以謂治亂之原固在乎壅蔽  
而所以致壅蔽者尤以委任之非其人也諺有之  
曰一指在前泰山不見姦臣在天子之左右其所  
以蒙蔽之者豈但一指若哉有一於此則凡布列  
之在近見聞之可及者且不能以自通矣况夫疏

遠之側微遐僻之幽隱而欲自通於九重之上難  
矣噫帝舜此四言真萬世帝王治天下之藥石也

循之則治違之則亂惟明主留神省察

舜曰咨四岳有能奮

起庸也事功

熙廣也帝堯也

之載事也使宅

居也百揆如宰相之職

亮明也采庶事惠順成

疇庶類僉衆也

曰伯禹作司

空

余言伯禹作司空可宅百揆

帝曰俞

然也

咨禹汝平水土

行司空之事

惟

時懋

勉也哉

勉以宅百揆之事

帝曰棄

姓姬氏

黎民阻

厄也

飢汝后稷

田正官

播

布也時百穀

帝曰契

姓氏子

百姓不親

不相睦

五品

父子君臣夫婦長幼朋友五者之名位等

級

不遜也

汝作司徒敬

事也

敷五教

謂父子有親君臣有義夫婦有別長

幼有序朋友有信以五者當然之理而為教令也

在寬

謂寬裕以待之

帝曰臯陶

亦臣名

蠻夷猾

亂

夏寇

劫人曰寇

賊

殺人曰賊

姦

在外曰姦

宄

在內曰宄

汝作士

理官也

帝曰疇

誰也若順也

予工僉曰垂

臣名有巧思

哉帝曰俞咨垂汝

共工

帝曰疇若予上下

上下山林澤藪也

艸木鳥獸僉曰益

亦臣名

哉

帝曰俞咨益汝作朕虞

虞掌山澤之官

帝曰咨四岳有能典朕三禮

祀天神享人鬼祭地祇

僉曰伯夷

姜姓

帝曰俞咨伯汝作秩宗

主釁次百神之官

帝曰夔

臣名

命汝典樂教胄

長子

帝曰龍

臣名

命汝作納言夙夜出納朕命惟允

帝曰咨汝二十有二人

四岳九官十二牧共二十二人

欽哉惟時亮天

功

曾鞏曰舜命九官新命者六人命伯禹命伯夷咨四



岳而命者也命垂命益泛咨而命者也命夔命龍因  
人之讓不咨而命者也夫知道而後可宅百揆知禮  
而後可典三禮知道知禮非人人所能也故必咨於  
四岳若予工若上下草木鳥獸則非此之比故泛咨  
而已禮樂命令具體雖不若百揆之大若其事理精  
微亦非百工庶物之可比伯夷既以四岳之舉而當  
秩宗之任則其所讓之人必其中於典樂納言之選  
可知故不咨而命之也若稷契皋陶之不咨者申命

其舊職而已

陳雅言曰二十有二人之職皆天之職也典天叙禮  
天秩服天命刑天討無一事之不本於天天有是事  
則人有是官天不自為而人代之帝舜於此語以欽  
哉亮天功者欲使知所敬也

臣按朝廷之上有百揆以統內之庶官有四岳以  
統外之州牧既分命之又總命之人必稱其官官  
必盡其職此帝世之治所以後世不能及也誠以

帝世之用人也或帝心之簡在或公庭之僉舉或  
詢之大臣或得之推讓非若後世有由旁蹊輿援  
阿私而倖進者也不問其人之能與否不論其職  
之稱與否是以用各違其才人不稱其官官既不  
稱則朝廷之政何由而舉政既不舉則天下之民  
何由得安此後世所以不古若也臣嘗因是而論  
之帝舜初咨四岳以求宅百揆也不曰熙舜之載  
而曰熙堯之載蓋以我今日所治之事非我之事

堯之事也總咨二十二人以各敬其職也不曰亮  
舜之功而曰亮天之功蓋以我今日所治之功非  
我之功天之功也爲人君者誠知人臣所熙之事  
皆祖宗之事所亮之功皆上天之功則決不肯徇  
私意以用人用匪人以廢事則朝廷之政得人修  
舉天下之民由是久安矣噫彼其以祖宗之官爵爲  
己之私物以上天之事功行人之私意豈不有以  
負祖宗之付託上天之建立哉識治體者尚鑒於茲

大禹謨

虞書嘉善也

言罔攸

所也

伏野無遺賢萬邦咸寧

朱熹曰舜然禹之言以為信能如此則必有以廣延衆論悉致羣賢而天下之民咸被其澤無不得其所矣

臣按朝廷為治之道固非一端而其要在取人之善用人之能而已夫人莫不各有所知亦莫不各有所能心有所知也發以為言已有所能也用以為才言有善否人君則惟其善而取之不使有所

伏藏於下才有大小人君則隨其才而用之不使有所遺漏於外則凡朝廷之上見於施行者無非嘉善之言列於庶位者無非賢俊之士天下其有不安也哉苟或不然所聞者皆卑冗順旨之言言之善者以為不善不善者反以為善所用者皆庸下諂諛之人人之賢者以為不賢不賢者反以為賢如是則善言不聞賢才遠遁欲事之理民之安難矣是以古之聖帝明王必廣開言路包容以納

之大闢賢門多方以來之雖以帝舜之為君大禹  
之為臣猶必以此為君臣克艱之效後世君臣可  
不以之為法則乎

德惟善政政在養民

朱熹曰德非徒善而已惟當有以善其政政非徒法

而已在乎有以養其民下文六府

水火金  
木土穀

三事

正德  
利用

厚即養民之政也

臣按朝廷之上人君脩德以善其政不過為養民

而已誠以民之爲民也有血氣之軀不可以無所  
養有心知之性不可以無所養有血屬之親不可  
以無所養有衣食之資不可以無所養有用度之  
費不可以無所養一失其養則無以爲生矣是以  
自古聖帝明王知天爲民以立君也必奉天以養  
民凡其所以修德以爲政立政以爲治孜孜焉一  
以養民爲務誠以一物不脩則民失一物之用一  
物失其用則民所以養生之具缺其一矣是故脩



水之政以疏鑿脩火之政以鑽灼脩金木之政以鍛鑄刻削脩土穀之政以耕墾播種使民於日用之間得以爲生養之具然猶未也又必設學校明倫理以正其德作什器通貨財以利其用足衣食備蓋藏以厚其生何者而非養民之政乎吁自古帝王莫不以養民爲先務秦漢以來世主但知厲民以養己而不知立政以養民此其所以治不古若也歟

洪範

箕子所陳以告武王者

次三

此洪範九疇之次三疇

曰農用八政

三八政一曰食

務農重穀之政

二曰貨

阜通貨財之政

三曰祀

報本反始之政

四曰司空

掌度土居民之政

五曰司徒

掌教養民之政

六曰司寇

掌立

法懲姦之政

七曰賓

懷柔賓客之政

八曰師

除殘禁暴之政

蔡沈曰八政曰農所以厚生也

史漸曰政莫大於是舜總之九官周分之六卿箕子

裂而爲八名雖異實無殊也

臣按洪範九疇次三曰農用八政其目凡八所謂

食所謂貨謂之農可也而祀以行禮賓以待客師  
以用兵與夫三官所掌之事皆謂之農何哉蓋天  
之立君凡以為民而已而民之中農以業稼穡乃  
人所以生生之本尤為重焉故凡朝廷之上政之  
所行建官以蒞事行禮以報本懷柔以通遠人興  
師以禁暴亂何者而非為民使之得以安其居盡  
其力足其食而厚其所以生哉是則上天所以立  
君而俾之立政之本意而為治者不可不知者也

後世朝廷之所施行宮闈之事則有之國都之事  
則有之官府之事則有之邊鄙之事則有之而顯  
顯及於農民之事者蓋鮮矣間雖有之而不知其  
本意之出於爲農泛然而施之漫然而處之往往  
反因之以戕民生廢農業是皆昧於洪範農用八  
政之本旨也

周禮惟王建國

周王建國都

辨方

辨別四方

正位

正祖社朝市之位

體國

營國家如身有體

經野

畫郊野如織有緯

設官

如冢宰司徒之類

分職

如掌治掌教之

類

以爲民極

以爲斯民至極之標準

葉時曰聖人以中道立標準於天下而使天下之人  
取中焉武王訪洪範於箕子以叙彞倫而五以皇極  
居中古今未有舍皇極而能立國者今以周禮考之  
土圭測景以求地中建國也面朝後市左祖右社辨  
方也朝分內外位別東西正位也公五百里至男百  
里體國也九夫爲井至四縣爲都經野也一曰天官  
至六曰冬官設官也一曰治職至六曰事職分職也

而周公則總之以為民極焉極也者不識不知順帝  
之則如堯之立民是也是彛是訓于帝其訓如周之  
敷言是也今周公所以為民立極者惟在王畿方位  
國野官職之中蓋王畿立而後根本定方位設而後  
等級明國野分而後疆理正官職舉而後綱目張民  
極之立孰有大於此者故周公不惟於天官言之而  
五官各引之以冠其篇首丁寧訓告若是諄複則是  
三百六十餘官事事物物皆有極何往而非斯民之

金匱要略卷一  
標準歟蓋極之所在所以習民於尊卑等級之中而導民於禮樂教化之內銷其亡等冒上之念而斂其安分知足之心斯民入則會其有極出則歸其有極經制烏乎而不定風俗烏乎而不淳

太宰之職掌建邦之六典以佐王治邦國一曰治典以經邦國以治官府以紀萬民二曰教典以安邦國以教官府以擾萬民三曰禮典以和邦國以統百官以諧萬民四曰政典以平邦國以正百官以均萬民五曰刑典

以詰邦國以刑百官以糾萬民六曰事典以富邦國以任百官以生萬民

吳澂曰治典者理之使不易其常然治必先官府而推以紀萬民則錯綜不遺于經爲詳教典者導之使不拂其常然教必先官府而推以擾萬民則馴習不違於安爲詳禮典者交好常有以相親統百官而推以諧萬民則相信不乖而和政典者分守常有以相制正百官而推以均萬民則至公無私而平刑典者



辭命常有以相戒傲百官而推以糾萬民則纖悉不差而詰矣事典者財利常有以相資任百官而推以生萬民則惠養不窮而富矣

臣按上天立君使之統邦國建官府以安民庶所以綱維于上而頒布於下者有六典焉治也教也禮也政也刑也事也分之雖有六名合之則歸一治故曰太宰掌建六典以佐王治邦國吁散之有統操之有要朝廷之政無不舉矣

乃立天官冢宰使帥其屬而掌邦治以佐王均邦國  
乃立地官司徒使帥其屬而掌邦教以佐王擾邦國  
乃立春官宗伯使帥其屬而掌邦禮以佐王和邦國  
乃立夏官司馬使帥其屬而掌邦政以佐王平邦國  
乃立秋官司寇使帥其屬而掌邦禁以佐王刑邦國  
乃立冬官司空使帥其屬而掌邦事以佐王富邦國

冬官亡以元  
吳澂說補之

鄭玄曰六官司徒司馬司空皆云司以其各能一官

不兼羣職太宰不言司者以其總御衆官不主一官之事宗伯亦不言司者以其祭祀鬼神鬼神非人所主故也

臣按此即周官六卿所分之職也唐虞之世有九官至周始分職爲六卿周公作周禮以此爲太宰建邦之六典至成王訓迪百官又復申明焉蓋天下之事統於朝廷朝廷之政統於六典所謂治所謂教與夫禮政刑工天下事盡於此矣洪惟我太

祖高皇帝革前代中書省而設六部罷丞相而設  
尚書侍郎以分掌朝廷之政蓋得周公之心於千  
載之上舉明王之典於三代之前可謂卓冠百王  
而足以垂法於萬世矣臣故舉此以為總論朝廷  
之政蓋以遵聖祖之制以見今日朝廷為政之大  
要其綱領在此也伏願皇上重六部之職簡卿佐  
之任以為朝廷出政之本其未用也慎於選擇不  
勝任也亟罷之其既任也專於委任能舉職也久

任之則治古之治不難復矣臣不勝惓惓

禮記是故先王慎所以感之者故禮以道其志樂以和其聲政以一其行刑以防其姦禮樂刑政其極一也所以同民心而出治道也

又曰禮節民心樂和民聲政以行之刑以防之禮樂刑政四達而不悖則王道備矣

臣按禮樂者刑政之本刑政者禮樂之輔古之帝王所以同民心出治道使天下如一家中國如一

人者不過舉此四者措之而已是則所謂脩道之  
教王者之道治天下之大經大法者也夫有大中  
之制以節民之心志有至和之節以和民之聲音  
行此禮樂之道則有法制禁令防此禮樂之失則  
有刑罰憲度始也治道由此而出終也王道因此  
而備禮也樂也政與刑也其用在天下其本在朝  
廷後之有天下國家者其尚端出治之本備王道  
之制而又為維持防範之具使之四達於當時通

行於天下其為治也孰加焉

論語子曰道

猶引導謂先之也

之以政

謂法制禁令

齊

所以一之也

之以

刑民免而無恥

謂苟免刑罰無所羞愧

道之以德齊之以禮

謂制度品

節

有耻且格

格致也謂民耻於不善而又有以至於善

朱熹曰政者為治之具刑者輔治之法德禮則所以

出治之本而德又禮之本也此其相為終始雖不可

以偏廢然政刑能使民遠罪而已德禮之效則有以

使民日遷善而不自知故治民者不可徒恃其末

謂政

刑

又當深探其本

謂德也

臣按德禮政刑四者凡經書所論為治之道皆不外乎此孔子分政刑德禮以為二而言其效有淺深朱熹則合德禮政刑為一而言其事相為終始要之聖賢之言互相發也夫人君為治固在脩德以為化民之本然人非一人地非一地人所稟有偏全地所至有遠近既化以德而有不一者須必有禮以一之然後吾之德化可行焉苟導之而不從



化之而不齊非有法制禁令又不可也法制以示  
之於前禁令以約之於後彼猶悖禮而梗化則刑  
罰之加烏可少哉孟子曰徒善不足以為政徒法  
不能以自行有政刑而無德禮是謂徒法有德禮  
而無政刑是謂徒善為政之道於斯四者誠不可  
以缺一者也孔子論治之言散見於經籍者多矣  
總論為治之要皆莫出於斯

宋朱熹告其子曰四海之利病繫斯民之休戚斯民之

休戚繫守令

今之知府知州知縣

之賢否然而監司者

今之布政按察司官

守令之綱也朝廷者監司之本也欲斯民之皆得其所  
本原之地亦在乎朝廷而已人君欲監司之皆得其人  
事之利病所以為民之休戚者皆得上聞惟以正朝廷  
為先務而正朝廷之具豈有大於用賢才也然其才之  
所長者不同則任之所宜者亦異願陛下於其大者使  
之贊元經體以亮天工於其細者使之居官任職以熙  
庶績能外事者使任典戎幹方之責明治體者使備拾

遺補過之官又使之各舉所知布之列位以共圖天下之事使疎而賢者雖遠不遺親而否者雖邇必棄毋主先入以致偏聽獨任之譏毋篤私恩以犯示人不廣之戒進退取舍惟公論之所在是稽則朝廷正而內外遠近莫敢不一於正矣監司得其人而後列郡之得失可得而知郡守得其人而後屬縣之治否可得而察重其任以責其成舉其善而懲其惡夫如是則事之所謂利民之所謂休將無所不舉事之所謂病民之所謂戚將

無所不除

臣按朱熹此言雖為當時時君而發然其所謂欲  
斯民之得所本原之地在乎朝廷而以用賢才為  
正朝廷之具必使內外大小之職進退取舍惟公  
論之所在是稽則朝廷正而內外遠近莫敢不一  
於正其言詳悉周備其間所謂稽公論一語尤為  
切要伏願聖明留意

以上總論朝廷之政臣聞宋儒朱熹有言天

子至尊無上其居處則內有六寢六宮外有三朝五門其嬪御侍衛飲食衣服貨賄之官皆領於冢宰其冕弁車旗宗祝巫史卜筮瞽侑之官皆領於宗伯有師以道之教訓有傳以傳其德義有保以保其身體有師氏以媿詔之有保氏以諫其惡前有疑後有丞左有輔右有弼其侍御僕從罔非正人以旦夕承弼厥辟出入起居罔有不欽發號施令罔有

不臧在輿有旅賁之規

旅賁勇士掌執戈盾夾車而趨

位宁

有官師之典

門屏之間謂之宁

倚几有訓誦之諫

工師

所誦之詞書之於几也

居寢有瞽御之規

瞽近也

臨事有

瞽史之道宴居有工師之誦史為書

太史君舉則書

瞽為詩工誦箴諫大夫規誨士傳言庶人謗

商旅於市

旅陳也

百工獻藝

獻其技藝以喻政事

動則左

史書之言則右史書之御瞽樂聲之上下

樂察

也謂察樂聲

不幸而至於有過則又有爭臣七人

面折廷爭以正救之蓋所以養之之備至於  
如此是以恭己南面中心無為以守至正而  
貌之恭足以作肅言之從足以作乂視之明  
足以作哲聽之聰足以作謀思之睿足以作  
聖然後能以八柄馭羣臣一曰爵二曰祿三曰予四曰置五曰生六曰奪七曰廢八曰誅以八統馭萬民一曰親親二曰敬故三曰進賢四曰使能五曰保庸六曰尊貴七曰達吏八曰禮賓而賞無不慶刑無  
不威遠無不至邇無不服傳說所謂奉若天

道建邦設都樹后王君公承以大夫師長不  
惟逸豫惟以亂民武王所謂亶聰明作元后  
元后作民父母所謂天降下民作之君作之  
師惟其克相上帝寵綏四方箕子所謂皇建  
其有極斂時五福用敷錫厥庶民惟時厥庶  
民于汝極錫汝保極董子所謂正心以正朝  
廷正朝廷以正百官正百官以正萬民正萬  
民以正四方者正謂此也熹之茲言所以論



人君爲治之道無復餘蘊凡夫愚臣所輯正  
朝廷六條之事皆備其中謹備載於篇以獻  
伏惟聖明留神觀省先正朝廷以爲治平之  
根本然後推類以盡其餘臣不勝大願

大學衍義補卷一